

زوجی...
مازال حبیبی
حوادیت

سارة درویش

دار انسان للطبع والنشر

زوجي ما زال حبيبي

سارة درويش

رقم الإيداع بدار الكتب : 7942/2010

الطبعة الأولى : يونيو 2010

تصميم الغلاف : محمد حلمي

إخراج فنى : شريف شقارية

مدير الـدار : طارق عميرة

دار إنسان

للإعلام والنشر والتوزيع

insanfirst@gmail.com

شكراً يا رب .. لأنك اختدته لي قدراً

إهداء ..

إلى كل زوجين لم يعتبرا الحياة الزوجية معركة
لابد فيها من طرف مهزوم وآخر منتصر ..
إلى كل زوجين أتقنا التسامح والغفران ..

إهداء خاص جداً إلى ...

الشاعر الرائع الراحل أمل دنقل والأديبة الجميلة عبلة الرويني

&

إلى د/ أشرف وجدي و د/ إيمان الجوهري

أدامكم الله عشاقاً

إهداء ..

إليك يا من لن يكتمل عالمي إلا بك ..

إليك يا " نصفي " الذي سينصفني به الله على الدنيا ..

إليك يا " طعم الحياة " ..

.. مع خالص عشقي

سارة

قَبْلَ مَا نَمْكِي الْمَوَارِدِ ..

من الرائع أن تشعر المرأة أن لها رجلاً ما .. رجل تستطيع أن تلجأ إليه إذا ضاقت بها الدنيا ..

رجل تثق بأنه لن يقابل شكواها بالضجر أو بالتشفي أو القسوة ...

لكن الأروع من كل هذا أن يكون هو بنفسه اختار أن يكون هذا الرجل ، اختار بكل حب أن يكون ملاذها ..

حصنها وأمانها..

ملاذي الحبيب وحصني الذي لم أشعر قبله بأمان .. أشكرك .. أشكرك لأنك اخترت أن تكون هذا الرجل.

أشكرك لأنك دائماً هنا .. تمنحني الضوء في أكثر ليالي حياتي عتمة وتمنحني الدفء حين يشتد السقيع ، شكراً لأنك

تتحملني بكل الحب .. بكل الرضا .. وكل الحنان.

زوجي الحبيب .. شكراً

سارة درويش

مملكه تحطي الفيسه ؟

" ممكن تقعد بقى؟؟ خيلتني !!!؟ " دي أنا ، كنت متترفة أوي منك .. علشان رايح جاي كل شوية

قدام مكتبي .. وانا مش عارفة أركز خالص بسببك ..

بصيت لي .. وكنت متوقعة مناقرة تاني زي كل يوم ، بس الغريب انك كنت طيب جداً وقولت لي

حاضر ..

استغربت بصراحة وقولت في سري " مش عوايده يعني " ، بس بردو مافيش فايده .. لقيتك قمت من

على مكتبك وجاي ناحيتي تاني فبصيت لك البصة المفترية بتاعتي وعيني بقولك " وبعدييييين بقى " ..

وقبل ما اتكلم فاجئتني بأغرب طلب في الدنيا

" احم .. سارة .. سارة .. ممكن تحطي الفيشة ؟ "

" افندم !!!؟؟ أخط ايه؟؟ "

" فيشة تليفون البيت .. أنا عارف انك دائماً فاصلة الفيشة

ممكن تحطيتها النهاردة بس حتى؟ "

من صدمتي من طلبك ما عرفتش أرد .. ولقيت نفسي غصب عني بقولك حاضر ، وقعدت دماغي تودي

وتجيب .. خاصة لما لقيتك استأذنت من الشغل ومشيت.

قعدت أفكر في طلبك الغريب واقول طب لو عايز يرخم عليا على تليفون البيت كده أكيد هعرف انه

هو !

وبعدين أصلاً يعني انا ما اديتهوش تليفون البيت !!

بعدين قولت لنفسي يمكن جابه من الدليل .. بس دي تبقى قلة ذوق يعني لما يتصل بيا وانا ما اديتهوش

الرقم .. اوف بقى

ونويت بصراحة اني اتخانق معاك لو عملتها ، ونويت اقعد جنب التليفون علشان اول ما تتصل اوريك
شغللك بقى .

بس لما روحت البيت كنت نسيت ، ونمت .. ولقيت ماما بتصحيني بتقول لي بابا عايزك .. قلقت اوي

خير ايه حصل ..ليه بابا بيصحيني علشان عايزيني ؟ الموضوع ضروري للدرجة دي؟؟

دخلت على بابا لقيته بيقول لي :

" هو انتي معاكي حد في الشغل اسمه ؟ "

قولت اوووبوا يبقى عملها الجنون ، واستعديت علشان ادافع عن نفسي

وقولت له ايوة يا بابا .. بس والله انا ما عرفش جاب رقم التليفون منين ؟ وكنت ناوية

ابتسامه بابا خليني اقطع كلامي واستغربت وقولت له : هو ايه اللي حصل يا بابا؟؟

فقال لي : (.....) عايز يخطبك

— !!

ذهلت شوية ..مش شوية انا ذهلت اوي بصراحة وفتحت في نوبة ضحك هستيري

بابا اكيييبييد بتهزر معايا .. صح ؟

" بهزر ؟!! وانا اعرف منين اسمه ؟ هو في هزار في الحاجات دي يابرت!! "

انا فجأة سكنت وقعدت افكر كل حاجة حصلت بيننا ، واحاول استوعب .. لألأ صعب .. لألأ

مستحيل دا احنا ناقر ونقير !!

بابا سابني ونزل .. تقريباً افكرني مكسوفة بس انا كنت مذهولة .. وساعتها بس فهمت سر طلبك

الغريب .



عريسك في اليد ..

خير منك عريسك بعد سنتيك

منذ طفولتي و هم عبثا يحاولون إقناعي بأن عصفورا في اليد خير من عشرة على الشجرة !..

ولم أصدق تلك الاكذوبة أبداً !..

" غادة السمان "



" يا بنتي عريس في اليد خير من عشرة على الشجرة وياختي دول مش عشرة على الشجرة .. دا

والله واحد وبعد سنتين انتي بتفكري ازاي؟؟ "

دا كان رأي ماما وتقريباً رأي كل اللي يعرفوا الحكاية .. الكل شايف اني المفروض اقبل العريس الجاهز

اللي هياخدني من ايدي على عش الزوجية في اقل من شهرين ، خاصة وانا مش بحب العريس رقم (2)

.. اللي هو انت ، ولا في بيننا قصة حب تخليني اعمل كده .

بس انا مش عارفة ليه كنت مرتاحة لك اوى .. يمكن علشان زميلي في الشغل .. يمكن علشان حاسة

اننا فاهمين بعض لأننا ياما اتكلمنا واتفقشنا واتفقنا في الشغل !!!

مش عارفة بس كل اللي اعرفه اني حاسة انك انت الانسان اللي انا عايزة اكمل معاه حياتي .

الأولاني كويس وكل حاجة لكن .. مافيش بيننا أى حاجة مشتركة ، دا زائد انه حاسس بنفسه أوى

ويمكن دا العيب الوحيد اللي فيه ، يعني حاسس ومتأكد إنه ما يترفضش ، و بيني وبينك حسيت إني

محتاجة الستين اللى انت محتاجهم عقبال ما نتجوز ، محتاجة اخطط لحياتي بروقان... ومحتاجة اكبر شوية
عن كده ، لأني حاسة اني لسة طفلة ..

استخرت ربنا كتييييير أوى وبصراحة كانت هي دي حجتى اللى بتلكع بيها .. لأني عارفة إن " الأخ
الواثق " مستعجل عايز يتم الموضوع قبل ما يسافر .

ايوة .. الأستاذ هيسافر برة .. ومتمر على هجرة وانا مش مرتاحة لكل دا .. و رغم إنى مش دايبة فى
دباديب مصر يعنى لكن بردو ما أحبش اسبيها .. مستقبلى هنا .. وحياتى هنا وأحلامى هنا .

اتوكلت على الله ورفضته واصريت على الرفض ، ورفضتك انت كمان وقولت لو ليا فيك نصيب
هترجع تاني .. وكنت بصراحة بدعي ربنا يكون ليا فيك نصيب .

وفعلآ .. رجعت بعد شهرين ، وما تتخيلش فرحتي باصرارك كانت قد إيه ، وكمان أهلي حسوا قد إيه
انت باقى عليا .. ولما صليت استخارة تاني حسيت إنى لسة مصرة عليك .

واخير

" شبكنا بدبلته .. وقرينا فتحته .. وعرفنا نيته وغلاوته عندنا "

لووو



دې مسټ دبله

زمان .. كنت بستغرب أوي لما أشوف واحدة مخطوبة أو متجوزة وطايقة الدبلة ومش بتخلعها من ايديها

أبدأ ، وكنت بقول ياربي .. ازاي هس تحمل دبلة سنة واتنين وعشرة ويمكن أكثر في إيدي ؟؟

بس دلوقتي فهمت .. من ساعة ما دبلك حاوطت صباعي وانا حاسة اني لابسة تاج .. حاسة اني بقيت

أميرة بجد .. لأ أميرة مين ! دا أنا ملكة .. كفاية إني أنا اللي انت اخترتها ، كفاية انك قولت لي نفسي

اجمع كل بنات الدنيا وامسك ايدك وأقول لهم

" هي دي حبيبتي .. هي دي مرايتي "

من يوم ما حاوط اسمك صباعي وانا حاسة اني مظمنة وهادية ورايقة .. كأن دبلك تيممة سحرية ضد

الحزن ، وكل شوية أبص لها وأسرح فيها .. أشوف فيها كل حاجة حلوة بيننا .. أشوف أول يوم شوفنا

بعض فيه ، وهزارنا وعنادنا ودماغنا الناشفة .. أشوف تلاكيكنا لبعض اللي كنا بنتحجج بيها من غير ما

نحس علشان نتكلم مع بعض، بشوف فيها يوم خطوبتنا .. وبتخيل انها بلورة سحرية .. هتوريني اللي

هيحصل بكرة وفرحتي بيبك وسعادتي معاك .

وبعد ما كنت زمان شايفة الدبلة " قيد " دلوقتي شايفها " طوق نجاة " ، أيوة طبعاً طوق نجاة .. لأن

حياتي مع أي حد غيرك ما كانتش هتبقى حياة .



لها اسمي .. خاتمٌ سيضيءُ

حين يحيطُ إصبعها

وأن أُصغي إلى قلبي

إذا صمتت .. لأسمعها

لها أن تبدأ الأحلام .. بي

لأتممها معها

" أحمد بخيت "

والله بحبك ..

بس بسستعبد

برغم إني وافقت على الخطوبة من غير ما يكون في بيننا أي ارتباط ، إلا إني بعد ما اتخطبنا اكتشفت إن قلبي كان يبحبك من ورايا.. و لما عرفتك اكثر ، لما عرفت احلامك ، لما شوفتك ازاي بتعبر عن مشاعرك ، صدقك مع الناس ، وحتى رخامتك وهزارك .. بدأ كل يوم عن يوم حي ليك يزيد عن اللي قبله ... وكل يوم عن يوم بحس اننا بنقرب من بعض اكثر ..

لكن .. كثير بحس انك زعلان مني او على الأقل قلقان و حاسس إني مش بحبك قد ما تحبني.. علشان انت دائماً تعبر عن حبك ليا و كثير أوي بتقول لي كلام من روعته مش بقدر أرد .. و كثير أوي ببيان عليك انك بتحبنى وانا شايقة خوفك عليا ، و وانا شايفاك عايز تحميني من كل حاجة وأي حاجة .. حتى لو كانت لسعة كبريت .. أو و انت قاعد عندنا في البيت وغصب عنك بتسرح فيا .. والله انت لو تعرف انا بحبك قد ايه هتفرح اوى .. أنا بحبك وبفهم معنى كل كلمة وكل تصرف بتصرفه بيبين قد ايه انت بتحبنى لكن يستهبل ويعمل عبيطة ، ولو ركزت شوية في تصرفاتي هتعرف اني بجد بحبك .

لو شوفت قد ايه بتوحشني .. وقد ايه بتكلم عنك مع اصحابي ، ومع اخواتي في البيت .. كل كلمة بتقولها بتدخل قلبي ومش بتطلع .. كل حاجة بتقول انك بتحبتها من غير ما أحس بلاقيها حببتي .. كل حاجة بتكرهها بلاقي حاجة بتنفرني منها .. أكيد دا مالوش معنى غير إني فعلاً بحبك لكن خايقة افتح قلبي ... مش خايقة منك ابداً لأ .. لكن خايقة ان ربنا يكتب علينا الفراق لأي سبب وكل حرف نطقناه يبقى ذكرى - رغم حلاوتها - بتعذبنا.

خايفة في يوم نندم اننا حيننا أوي كده وإننا ما عملناش حساب الفراق .. لكن ما تخافش .. بكرة نتجمع

في بيت واحد وصدقني ... هبطل استهبال ;) ;



ۛۛۛ ٲٲا عٲنا

أي مكان ما مشتت فيه معاك بعتره مش موجود على الخريطة .. معاك رسمت خريطة جديدة للعالم ..

خريطة ما فيهاش غير مصر .. ومش أي مصر كمان .. دي مصر بتاعتنا .

مصر بتاعتنا ما فيهاش غير كل شارع توهنا فيه ، وكل مكان روحنا اشتغلنا فيه ، وكل شقة روحنا

اتفرجنا عليها ، وكل مطعم أكلنا فيه .

مصر بتاعتنا عاصمتها "هنادي" ، ومركز الإذاعة والتلفزيون فيها " برج القاهرة " اللي قولت فوقه بعلو

صوتك انك بتحبني ☺

مصر بتاعتنا بحبها اوي .. بشوفها بعين تانية خالص .. بشوف البيوت طيبة أوي علشان بتضلل علينا ..

وبشوف الشوارع فاضية جداً مهما كانت زحمة ، لأنك وانت معايا مش بشوف غيرك في الدنيا .

مصر بتاعتنا .. المواصلات فيها عدوي اللدودة لأنها بتسرق الوقت وتسرق كثير من خطاويننا سوا ،

واحنا كل خطوة لينا مع بعض بفرحة وضحكة وذكرى حلوة ..

معاك وبس بحس اني من قلبي عايزة أغني .. حلوة يا بلدي (:



مفتاح بكرة

احساسى لما مسكت بإيدي مفتاح شقتنا ما يتوصفش .. شقتنا .. اللي هي بيتنا .. بيتي أنا وانت .. أول حاجة تبقى بتاعتنا .. أنا وانت .

حسيت كأني ماسكة مفتاح الجنة .. أي نعم الجنة دي كانت مش كبيرة أوي ، وكانت لسة محتاجة توضيب كتير أوي .. بس كفاية انها بتاعتنا ، كفاية اننا هنعيش هنا .. وأحلام عمري هتتحقق وتكبر هنا ، كفاية إني هتولد من جديد هنا .

ما توقعتش اني أحبها أوي كده .. من أول نظرة ، دا حتى المفاتيح كنت بعاملها كأنها جواهر نادرة ، كنت كتير أوي بحضن المفاتيح .. وكأني بحضن أحلامي .. بحضن بكرة



يا بكرة بسنتناك .. ليك العيون حنوا

" منير "

عارف يعني ايه اكون مرانك؟!

بكرة كتب كتبانا .. كتاب حياتنا اللي جاية .. بكرة هتكتب شهادة ميلادي اللي بجد ، من بكرة هبقى

مراتك .. عارف يعني ايه اكون مراتك؟!

دا مش بس معناه اني هعيش مع انسان اخترته واختارني .. مع انسان هيستحمل عصبيتي .. تعبي ..

فشلي ، مع انسان هيفرح لكل حاجة حلوة اعملها مهما كانت صغيرة ، انسان أحس معاه اني " معايا

"مش مع حد تانی ..

لما اكون مرارتك دا معناه إني هضمن إني من حقي أناديك في آخر لحظة من عمري ، واطلب منك تقعد

معايًا شوية لأني خلاص بموت .. علشان عايذة اشبع منك .. وانت تقولي " لأ .. ما تقوليش كده "

وترعل مني .. وأشوف في عنيك لحظتها كل حاجة حبيتها فيك .. المح خوفك عليا .. حبك ليا ..

زعلك مني .. وابتسامتك وانت بتحاول تظمني ..

وأفضل باصة لك لحد ما روحي تروح لربنا .. وألح ملاحي في ملامحك واتطمئن .. لأني عارفة ابي هفضل

عائشة فيك وبيك زي ما كنت طول عمري عائشة بيك وليك

ياااااااااا يا رب ما اتحرم من اني أعيش معاك اللحظة دي ، يااااارب لما اموت اكون مراتك ، ويكون

اسمى جنب اسمك لحد ما نتقابل تاني .. في الجنة ان شاء الله



رحمك ورحمك شهادة ميلاد

" من "

الفرق بين أول وتاني نسخة

أول مرة تشخط فيا فرحت اووووي .. لأسباب كثيرة أولها انك شخطت فيها واتنرفزت علشان كنت قلقان عليا ، فحسيت قد ايه انت بتحبني بجد ، وتاني سبب علشان حسيت اننا خلاص مابقاش بيننا فرق ، مابقيتش تتعامل معايا بقى بأسلوب المخطوبين واللي هو رقة بقى ومش عارف ايه ، تالت سبب علشان انا كان نفسي اشوفك وانت بتشخط علشان ما تخضش منك بعد كده .

لكن تاني مرة لما شخطت فيا .. زعلت اوي وعيظت .. مش زعلت منك .. لأ .. انا اصلاً ما بعرفش ازعل منك لكن ... زعلت من الشخطة ، حسيت اني ما بقيتش أميرتك .. مافيش حد بيشخط في اميرته :)

وكمان زعلت علشان ماكنش ليا ذنب .. انا عارفة ومقدرة انك تعبان ومتضايق وعليك ضغوط كثيرة لكن .. كان نفسي تبقى زيي لما اتضايق او الدنيا تخنقني اوي اجري عليك واعيظ لك واقولك شوفت حصل لي ايه ؟؟

انا لو زعلانة من الدنيا كلها مجرد ما اسمع صوتك او اشوفك بهدى ويتطمن ومش بقدر اكشر .

بس يا سيدي .. دا الفرق بين اول شخطة .. وتاني وآخر شخطة زي ما وعدتني ..

وانا مصدقك ... مش بس علشان بجبك .. لأ علشان أنا واثقة اني مش ههون عليك .. وواثقة اني

هفضل طول عمري في نظرك اميرتك وحببتك .. لو حتى فات على جوازنا مليون مليون سنة



فستان الفرح

" فستان الفرح " .. مش فستان " زفاف " وبس .. لأ .. دا فعلاً فستان الفرح .. فستان الفرح يعني

كل الفرحة متلخصة في توب أبيض وطرحه ..

فستان الفرحة يعني الحاجة اليها كل بنت من أول ما تعرف تمسك القلم والورقة .. وترسم ..

وتعبر بالفسطان عن أحلام كتيبييرة اوي.. حلم انها تكون أميرة زي اللي يبحكوا عنهم في الحواديت ،

حلم ان يكون ليها زوج وحبيب ... حلم ان يكون ليها اولاد .. حلم بزغاريد وطبول ونور .. أحلام

كثيرة اوي بتختصرها البنت في فستان وطرحه ...



النهاردة كنت بقيس فستان الفرح .. رغم إني شوفته قبل كده لما اختارناه سوا .. لكن النهاردة كان

احساسی مختلف . كنت حاسة كأني أول مرة بشوفه .. وحاسة برهبة وفرحة ومليون احساس مختلف

وانا بقيسه ، و بدأت أحس بجد إني عروسة .. والموضوع بجد بقى !

وغضب عني عيني لما عيني جات في عين ماما أول ما لبست الفستان .. عينيها كانت بتقول لي

ياااااا كبرتي يابنتي .. وكانت بتقول لي الحمد لله ... شوفتك عروسة .. وكانت بتقول لي هتوحشيني

وحاجات کتیبییر اوی .

وأنا كمان .. فجأة حسيت انى كبيرة بقى .. أنا عروسة !!

كلمة عروسة اللي ياما اتقالت لي من وانا صغيرة مختلفة أوي النهاردة .. أنا فاضل لي كام يوم وابدأ حياة
تانية مع انسان بحبه ، بس بردو .. هفارق ناس كتير بحبها ، أنا هبقى عروسة بقى واقعد على الكوشة
.. الكوشة اللي كنت بتكسف اطلع عليها علشان ابارك لعروسة قرييتي أو صاحبتى والناس هتقعد
تبخلق فيا وتجيبي من ساسي لراسي .. وياسلام بقى على البنات اللي كانت حاطة عينها عليك ..
هتطلع فيا القبط الفاطسة وتقول في الآخر ما لاقاش غير دي ؟؟ حتى لو انا ملكة جمال الكون .

احم ... بقولك ايه ؟ هو احنا لازم نعمل فرح !!؟



رقصة سلو

كل ما اسمع اغنية رقيقة وهادية اقعد اقول هنرقص على الأغنية دي سلو في فرحنا ، وأقعد اتخيلك وانت
بالبدلة وزى القمر .. مكسوف وفرحان وقلقان ، وأتخيلني في فستان الفرح .. أميرة بجذ لأني بقيت
ملكك .. وأنا قلبي هيقف من الفرحة ومش مصدقة إني بعد شوية هبقى معاك طول سيني .. وكل لحظة
في عمري ، وأقعد أفكر .. هو أنا ياترى هبقى سامعة حاجة ؟!!

مأظنش .. أنا هبقى في دنيا تانية .. هبقى بس سامعة صوتك بيتردد في ودي ، وانت بتقول : " وأنا
قبلت زواجها على سنة الله ورسوله وأشهد أن اراعي فيها حدود الله و "
وهبقى بس سامعة صوتك يوم ما جيت تتقدم لي .. وانت بتكلم بابا. وانت بتقوله " ياعمي " لأول مرة
، صوت أول زغروطة رنت في ودي .. صوت بابا وهو بيسألني موافقة ولا لأ وأنا قلب جوايا بيقول ..
" هي محتاجة سؤال ؟ هو انا عمري اتمنيت غيره في الدنيا ؟ !! "

ولما المأذون سألني موافقة ولا لأ .. و كان على طرف لساني أقول له " وانا ازاى أصلاً اوافق أعيش من
غيره ؟!! "

تفتكر وانا سامعة كل دا في ودي ، وحاسة بكل الفرحة دي ، هتفرق معايا الاغنية اللي برقص عليها
سلو؟



ياترى عمرك فکرت في احساس الجنين ليلة ميلاده؟؟

متهيأني أنا دلوقتي عارفة احساسه .. هو بيكون مرتاح جوا بطن مامته .. ومطمئن .. بس مشتاق يتولد ..

مشتاق للنور .. للحياة .. الحياة المختلفة عن حياته جوا .. مشتاق يبدأ حياة حقيقية .. بكل فرحتها

ولذتها وشقاها وتعبها ومشاكلها .

أنا دلوقتي كده .. حاسة اني هتولد بكرة .. وهبدأ حياة جديدة ومختلفة حياة اخترت فيها حاجات كتير

أوي ، وحبب فيها حاجات كثير أوي

وخائفة فيها من حاجات كثير .. خائفة من المسؤولية ، وخائفة لأني برودو مهما عرفتكم حاسة اني لسة

ما اعرفكش أو لسة ما اتعودتش عليك أوي لدرجة اننا نعيش أربعة وعشرين ساعة مع بعض .

وقلقانة .. مش عارفة الفرح هيكون ازاي؟! ياترى هتحصل مشكلة تبوظ عليا اليوم اللي مستنيه طول

عمري؟؟ ولا هيعدي علي خير؟

ومش عارفة ازاي بجد بعد ما الفرح يخلص مش هروح مع بابا وماما واخواتي !!

وفي نفس الوقت فرحاً.....أنة أوي إننا أخيراً هيكون بيتنا واحد ، ولما نكون برة البيت مع بعض ونقول

هنروح ييقي دا معناه اننا بردو هتفضل مع بعض .. مش كل واحد يروح في طريق .

ياربى .. أنا مش عارفة أناام ، ومش عارفة أصحى .. ومش عارفة افرح ولا اعيط .. عايزة أفرح ..

ومحتاجة أعيط !!

عارف احساسی بالظبط یتوصف ازای؟؟ عارف أغنية أغداً ألقاك؟؟

هي دي أدق وصف لحالي ..

"أغداً ألقاك .. يا خوف فؤادي من غدي .. يالـ شوقي واحتراقي .. في انتظار الموعد"



النهاردة .. أنا عروسة

صحيت من النوم بإحساس العروسة :) حاسة ايني مختلفة رغم إيني مش متغيرة ، حاسة إيني فرحانة وقلقانة .. ومكسوفة أوي من كتر ما الناس عمالة تقول لي يا عروسة ، وايه الحلاوة دي .. رغم ايني ما كنتش

لسة احلويت ولا روحت الكوافير وكده !

حاولت أفطر وما عرفتش .. أنا أساساً لما بفرح ما بعرفش آكل وانا عمري ما فرحت قد النهاردة ..

ولما بكون قلقانة ما بعرفش آكل .. وعمري ما قلقت قد النهاردة ...

وكمان لما بزعل ما بعرفش آكل .. وانا زعلانة إلى حد ما النهاردة .. مش عارفة ازاي هعيش في بيت

ماما مش عايشة فيه .. وانا اللي كنت لما ماما تسافر ما بعرفش آكل ولا اشرب ولا اناام ولا اعمل أي

حاجة . كمان مش متخيلة ايني بكرة لما اصحى من النوم مش هلاقي نفسي في أوضتي .. وإيني أصلاً

المفروض ابطل اعتبرها أوضتي !

ولما جينا ماشيين أنا واصحابي علشان أروح الكوافير .. حاولت على قد ما أقدر ما ابصش في عين ماما

علشان ما اعيطش ... بس بمجرد ما اخدتني في حضنها ماقدرتش .. عيطنا أوي وما كنتش عايزة

اسيب حضنها ، لحد ما ماما ضحكت بالعافية وقالت لي .. " يخرب عقلك الناس هتفتكرنا غاصبينك

على الجوازة ههههه " .. ضحكت وسيبتها و رايحة اسلم على بابا عمل نفسه مشغول وانه بينده للسواق

يقرب العربية قدام الباب ، وحاول على قد ما يقدر ما يبصليش علشان خايف دموعه تغلبه ..

هيوحشوني أوي .. هيوحشني احساسى يايى بنتهم وآخر العنقود .. رغم اى هفضل بنتهم ورغم اى
هشوفهم تانى كمان شوية فى الفرح وبعد الفرح وبعد كده كمان هشوفهم وازورهم دائماً .. بس هبقى
بزورهم .. مش عايشة معاهم .. هبقى كبرت خلاص .

اصحابي طول المشوار قعدوا يتريقوا عليا ويضحكوني .. قعدوا يرغوا يرغوا يرغوا .. ما بيسكتوش لحظة مش مديني فرصة اتكلم خالص .. علشان عارفين انهم لو سكتوا انا هسرح في ماما و بابا وهعيط وعارفين انهم لو سابوني اتكلم هعيطهم هم نفسهم ..

وصلنا الكوافير ، والست الكوافيرة قعدت تحط لي ماسكات غريبة على وشي وانا اضحك
.. كل ما اقعد اتخيل شكلك لو شوفتني بالمنظر دا هتقول ايه .. من كتر ما بتسم واطحك الست قلقت
مني فخفت تفتكرني مجنونة وتخاف تعمل لي حاجة فقولت لاصحابي علشان تسمعي اللي انا بفكر فيه ..
كلهم فطسوا من الضحك وقعدت كل واحد تتوقع تعليقك .. وفي الآخر الأندال صوروني وهددوني
باعتولك الصور دي على الكوشة .

بعد اما شيلت الحاجات الغربية دي من على وشي لبست فستان الفرح .. ساعتها بجد رجوع لي الاحساس
المرعب ياااي عروسة !

ياهو ي.. أنا هلبس الفستان دا ؟ وهقف قدام الناس !!

وكلهم هيقعدوا يقولولي ايه الخلاوة دي - حتى لو انا مش حلوة هيقولوها بردو - يا خراشي .. انا

بنکسف یاناااااااااس !

قعدت حوالي ساعة .. الكوافيرة تقول لي يابنتي ما ينفعش المكان هنا مش مكيف والميك آب

كله هيسيح ..

وانا مااافيش .. واصحابي يقنعوني اخرج .. وانت وبابا واخويا عمالين تتصلوا بيا .. وانا مش قادرة كل

ما اشوف استعجالكم اتوتر زيادة !

في الآخر واحدة من اصحابي استندلت وطلبت ماما من ورايا وقالت لها اننا مخلصين ..كنت عايزة اقتلها

.. لولا انى عروسة بردو

ماما ما رضىتش تدخل علشان ما نعطش تانى .. وبابا واخويا دخلوا بقى ياخدوني لىك .. انت أول ما

لَحْتَنِي مِنْ بَعِيدٍ شَوْيَةَ عَيْنِكَ لَمَعَتْ وَدَمَعَتْ ..

لما قربت بقي ما عرفتش اشوف تعبيرات وشك لأني من كسوفي ما قدرتش ابص في وشك .. مسكت

ايدي وقولت لي بالراحة .. " اكثر حاجة بموت فيها فيكي من زمان هي كسوفك "

انا :

"عارفة .. انا طول عمري شايفك حلوة .. بس النهاردة انتي أحلى .. مش علشان الفستان اللي هياكل

منك حته ولا علشان الميك اب اللي مبين جمالك أوي .. انا شايفك حلوة أوي النهاردة .. علشان انتي

النهاردة حلالى "

لحد كده بقى وكفاية ما قدرتش .. قولتلك خلااااص هيغمى عليا والنبى اسكت بقى .

قعدت تضحك عليا بردو لحد ما وصلنا للعربية .. ورغم ان المسافة بين قاعة الفرح والكوافير كبيرة نوعاً
ما إلا اني حسيت ان الوقت عدى بسرعة .. بسرعة دخلنا القاعة .. بسرعة اتزفينا .. بسرعة قعدنا على
الكوشة .. وبسرعة بردو قمنا رقصنا سلو .. وبسرعة قعدنا والناس جات قني وناس كانت بتغني
وبترقص حاجات كتير أوي حصلت وانا مش فاكرة أي حاجة .. كل اللي فاكراه اني كنت مش
مصدقة ، واني قولت لك : " هو دا فرحنا بجد ولا انا بحلم؟؟ " فضحكت
وشوية تاني قولت لك " هو انت مصدق؟؟ " فضحكت بردو .. وبس مش فاكرة أي حاجة حصلت
بعد كده



حرۃ الاستاذ (.....)

زمان كان مافيش عندي أحب من أي الاقي حد يعرفني " أنا " .. وان حد يقدمني كـ " أنا " .. مش

بتهمني ألقاب ولا حاجة لكن كل اللي بيهمني كينونتي .

لكن النهاردة لما زميل ليك كان بيقدمني لمراته ويقولها :

" حرم الاستاذ "

ياااااااااااا انا ما حسيتش بحاجة بعدها .. انا توهمت في الكلمة .. أنا حرمك .. أنا في حمايتك !! أنا منك

..

حسيت إني فخووووووورة أوي بيك رغم إنك يعني مش أشهر من توم كروز ولا أغنى من بيل جيتس ..

لكن فخووووورة جداً بيك " انت " .. انت اللي اعرفه اكتر من أي حد في الدنيا .. انت اللي عارفة قد

ايه طيب ، وقد ايه نفسك تعمل حاجات كويسة اوي في الدنيا ، وقد ايه قلبك مش بيقدر يشيل حقد

ولا كراهية .. قد ايه صريح ومش بتحب تكون منافق ولا مخدع ، انت اللي حبيته ، وبجد جدير

بالحب وجدير يا بني أفخر إني انتمي ليك .

ربنا ما يجرمني من وجودك في حياتي .. ولا يجرمك مني (أكيد مش هتلاقي حد يحس بكل الأمان دا

جنبك غيري .. دا طبعاً غير إن مافيش حد بتواضعي (؛)



لما لقيتك

لما لقيتك عرفت يعني إيه " وحشتني " ويعني إيه " محتاجة اشوفك " ويعني إيه " ب ح ب ك " ، يعني إيه

اتولد في كل مرة ابص فيها في عينيك عرفت ازاي ممكن اكون مستعدة أدفع لك عمري بجد .

عرفت ان الحب الحاجة الوحيدة اللي ممكن تخليني ادعي ربنا ياخذ من عمري ويديلك ، وادعي ربنا

يخفف عنك ويبتليني .. ولو لازم حد فينا يتألم يبقى انا وهبقى مبسوفة .

عرفت ازاي لما افرح انت اول حد يخطر في بالي ولما الدنيا تضيق عليا انت تبقى الراح ، فهمت ازاي

الحب بيخلي العشاق مجانين وأطفال وكمات بيخليهم زي الأنبياء .. قلبهم ابيض وجواهرهم غفران

وتسامح للكون كله .

عرفت طعم ومعنى الدنيا والضحكة والفرحة والشوق والوحشة والوجع .. عرفت معنى الخوف والأمان

، والحب اللي بجد . كل دا حصل لي لما لقيتك .. لأني عمري ما حببت بجد إلا لما لقيتك .

ربنا ما يجرمني منك



لا تَعِدْكَ

تعرف اني قبل ما اعرفك كان عندي الموت أهون من اني اقول حاضر ؟ آه والله ، وكنت بقعد ألف وادور حوالين أي أمر أي حد أمرني بيه علشان احسس نفسي اني بعمله من دماغي مش بسمع كلامه . لكن معاك .. بقيت بستمع بجد يا بني اسمع كلامك .. عارف لما تبقى حاسس بلذة وانت بتسجد لربنا وبتطيعه ؟؟

انا بحس كده .. بفرح اوي لما احسك راضي عن حاجة عملتها او فرحان بيها .. بفرح اوي لما تطلب
مني أي حاجة .. لو حتى كوباية ماية .. بفرح لما تطلب مني أساعدك في شغلك ، او اعمل حاجة فيه
بدالك .

و ياسلااااااااااا ما بقى لما اقترح عليك اقتراح وتعمل بيه .. حتى لو كان حاجة صغيرة .. يااااااااااااااااااااا هبقى
هطير في السما من الفرحة .

طب انت فاكرك لما اقترحت عليك لون معين للبدلة والجرافة يوم فرح محمد أخوك واشتريتهم فعلاً؟؟

ياااااااااااااه كنت مظأطة اوووووووووي .. وكنت حاسة قد ايه انت

واثق في ذوقي ، وقد ايه حابب تسعدني واني اشوفك زي ما محب

بجيك أوي .. وبحب نفسي كل ما احس انك راضي عني .. يااارب أموت وانت راضي عني يارب



كنت صغيرة .. وكبرت

كنت صغيرة .. قبل ما احبك .. كنت صغيرة فعلاً ... عقلي صغير ، قلبي صغير ، ما بعرفش أسامح ، ما بعرفش أعذر حد .. ما بعرفش أحب حد بجد .

لحد ما عرفتك .. وكبرت بيك أوي .. مش بس بأخلاقك الحلوة .. كبرت بثقتك فيا .. بإنك بتقول لي .. لأ سارة حبيبي ما تعملش كده ، دا مش من أخلاق الأميرات يا سمو الأميرة .

بيك اتعلمت اسامح ، وبيك اتعلمت اغفر لأي حد أي حاجة بمجرد ما اشوفك وبيك اتعلمت اكون أقوى وأكبر من الهم والحزن .

حتى في شغلي برودو كبرت .. كبرت بتشجيعك ليا ، كبرت وانت ماسك بإيدي وبتأخذ بإيدي من خطوة لخطوة تانية لقدام .. وانت بتقول لي انا معاكي ما تخافيش وما تتردديش .. وما يهكمش من أي حاجة .

كنت صغيرة فعلاً .. ودلوقتي كبرت ، وبكبر وهكبر ... طول ما انا معاك .



عندي ثقة فيك

وانا والله بثق فيك .. لو مش بثق فيك مش هحط عمري بين ايديك ، لكن .. بصراحة ماعرفش ليه عفريت بيركبني لو شوفت أي بنت او ست بتكلمك ، مهما كانت قد ولادك ولا قد مامتك ولا من سننا .. بحس اني من كتر حبي فيك عايزة اخبيك عن كل العالم .

علشان عارفة قد ايه انت انسان روعة وممكن أوي أي حد يحبك .. وانا واثقة فيك لكن ماحبش حد يحبك ولا يبقى مجنون بيك غيري .

واثقة فيك بس مش بحب حد غيري يكون حلو في عينك ولو للحظة ، واثقة فيك لكن احب ابي اكون انا اقرب واحدة لقلبك كزوجة وحببية وصديقة .

انا اساساً بغير عليك حتى من اصحابك الشباب لو حسيتهم هيقربوا ليك اكتر مني ، و والله بحاول اكنتم
وما ايبنش ، وبحاول ما اخنقكش والله بداري في قلبي غيرة اضعاااااااااااف اللي بينها ليك
بس ما بقدرش .. غصب عنى بغير عليك

Love

"في نومى

أَغَارُ مِنْ نَوْمِكَ

أستيقظ لأتفقد أحلامك

أحدّق طويلاً فيك

كلّما خلدت للنوم

باشِر قلبي نوبة حراستك

خشية أن تُغري الموتَ وسامتُك

فيطيلَ نومك "

أحلام مستغاني

شوف حل بقي .. كده مش نافع

بجد كده مش نافع .. وصلت في حبك لدرجة اني مش شايفة في الدنيا غيرك ، كل الدنيا عندي انت ..

كل حاجة حلوة اشوفها عايزاها تبقى بس ليك .

كل زمايلي في الشغل بتلغبط وانا ديهم باسمك ، وطول ما انا قاعدة لوحدي .. بحس انك معايا وبنسى

وبكلمك ، وبعدين افكر انك لسة ما جيتش .. او اني في الشغل وانك مش معايا .

وما بقيتش اعرف اكل الا معاك .. ولا اتفرج على التلفزيون الا معاك ، ما بستمعش بالشاي بتاعي

الا على ريحة قهوتك ، وبقيت بغير عليك لدرجة مرضية .. انت عارف ؟

اسمك على موبايلي بفضل اغير فيه لحد ما يبقى بعيد عن اسم اي بنت !! بغير من كل حاجة تشوفها

وتعجبك وما اكونش انا اللي عملتها .

يا لهوي .. انا شكلي بقيت مجنونة بطل .. لأ دا أنا مش شكلي اتجنت .. دا اكيييييييد .



هتطلقني؟؟

من كام يوم و انا كل شوية تتحكي قدامي حكاية واحدة جوزها طلقها من كتر الغيرة ، وشوفت فيلم عربي بتاع نجلاء فتحي وحسن يوسف النهاردة لما كانت نجلاء فتحى مبهدلاااااااااااااااااااا بالغيرة .

وكملت بمكالمة في برنامج اسامة منير واحدة اتطلقت بعد جوازها — 6 شهور بسبب الغيرة .

فحاسة انها رسايل ربنا يبيعتها لي علشان الم نفسي شوية وابطل اغير عليك بالشكل المرضي دا ..

والله بحاااااااااااااااااااا اول .. بحاول استعبط على نفسي واقنع نفسي ان الستات مش هتاكلك يعني ، بس

مش قادرة .

بس سيبك من دا كله .. هو انت بجد ممكن تطلقني؟؟ أياً كان السبب ممكن بعد ما روحنا طلعت
علشان نتجوز ونعمل البيت دا نتطلق؟؟ ببساطة كده!!

المصيبة اني قرئت في كتاب ان الطلاق بالنسبة لللاتين المتجوزين عن حب عبارة عن شكل جديد من اشكال الحب ويمكن يحصل .. انا مش متخيلة ان مهما حصل ممكن تفرط فيا.. مش متخيلة انك بكل بساطة تقول لي انتي طالق وكأنك بتقول لي ببساطة انا مش عايزك ولا عايز بيتنا ولا عايز اكمل عمري

معاكى

وكمان مش عايز تبقى ليا في اللجنة وبكل بساطة متصور انك تكوني مرات حد غيري وتعيشي معاه الاحلام اللي حلمناها سوا .. بأحفادنا وبيتنا لما نعجز والحب اللي العالم كله هيحلف بيه .. يجد مش متصورة ان دا ممكن يحصل .

وعلشان كده كنت هصحيك من النوم اقولك انت ممكن تطلقني؟؟

بس افكرت .. انت مسافر في شغل ومش جنبي ، فمسكت التليفون ولسة هطلبك بعدين افكرت ان

الساعة دلوقتي 3 الفجر ،

وافكرت ان دا بالظبط اللي حصل للي اتطلقت بعد جوازها بـ 6 شهور

فلميت نفسي بصراحة D:



ما فيش و كيد نيابة

شكيت فيك لما لقيتك معتر اوي بالقلم دا .. وكذا مرة اسألك اشعنى يعني؟؟!! فانت تبتسم وتقول " مالكيش دعوة " طبعاً انت عارفيني موسوسة وبشك من أي حاجة ، قعدت بقى اضرب اخماس في اسداس وشكيت في كل الاحتمالات الممكنة :

" أكيد حبيبته الأولانية ولا حاجة هي اللي اديته القلم دا "

" ولا يمكن واحدة معجب بيها مسكته فهو معتر بيه "

" لالأ أكيد دا القلم اللي كتب بيه أول جواب غرامي "

بصراحة بقى .. انت غلطان علشان ما ريحتيش ، وانت اللي اضطررتني أعمل كده .. اخدت القلم من على مكتبك وخبيته علشان تسأل عليه ولما تسأل عليه وانت متترفز طبعاً أقولك انت متترفز كده ليه ؟ وانا لازم اعرف حكاية القلم دا ايه ؟

وقد كالأاان .. انت اتجننت لما ما لقيتش القلم ، وانا زيدت الطينة بلة وقولت لك يمكن رميته وانا بروق المكتب ، زعقت لي للمرة الثالثة في حياتنا ☹️ رغم انك وعدتني قبل كده عمرك ما ترعق لي بس بصراحة كان معاك حق .. أنا مستفزة أنا عارفة ، لما لقيتك اتعصبت اكثر ما انا اتوقعت اتجننت أكثر .. انت ليه يعني فارق معاك القلم دا أوي؟؟ وقولت لك كل اللي شاكة فيه .

انت كشرت تكشيرتك اللي بتقطع قلبي دي ، وقولت لي :

" دا القلم اللي مضيت بيه في كتب كتابنا يا سارة ولو كنتي فتحتيه كنتي هتلاقي فيه ورقة بتاريخ كتب

كتابنا .. حرام عليكى انتي عمرك ما هتثقي فيا بقى !!! "

انا سمعت كده واتفحت في العياط .. صعب عليا اني ظلمتك وصعب عليا اني عملت مشكلة علي
حاجة هايغة ،وصعب عليا انك حاسس اني مش واثقة فيك ، وفتحت القلم فعلاً لقيت الورقة ومكتوب
فيها ...

" 24 / 6 / 2008 .. نفس اليوم اللي شوفتها فيه .. نفس اليوم اللي حققت فيه احلى احلامي

الف حمد وشكر ليك يارب "

لما قرئت الورقة انهزت زيادة .. وما بقتش عارفة اعمل ايه .. بس افكرت كلامك قبل كده ليا ، ونزلت
اشتريت كيس شيبسي .. و حطيت القلم في علبة وغلفته .. وطلعت .. اعتذرت لك وقولت لك ممكن
تقبل مني الهدية دي .. فتحتها وضحكت وقولت لي آه يا مجنوووووونة ، بعدين قدمت لك الشيبسي
وقولت لك صافي يالبن ؟؟

ابتسمت لي وقولت لي صافي يا لبن .. لكن بالرغم من كده احنا لسة علاقتنا متوترة أوي .. انت
أعصابك مشدودة أوي ، و كل سؤال بسأله بتاخده بحساسية ، و بتفتكر إن سببه إني شاكة فيك .. و
أنا عارفة إني فعلاً زهقتك ، وعارفة إني بقيت عاملة زي الشاويش أو وكيل النيابة .. اسئلي زي
التحقيق وشكوكي ما بتنتهيش .

عارفة إن دا عيب كبير فيا .. بس والله أنا خلاص بحاول أعود نفسي إني ما أشكش فيك ، و قررت
أكون واثقة فيك وفي نفسي أكثر من كده .. ونفسي بجد نرجع أصحاب من تاني .. عايزة أفتح معاك
صفحة جديدة و بوعدك إن مافيش وكيل نيابة من النهاردة .

من النهاردة مش هحاول أعرف منك غير اللي انت عايز تقوله وبس و هحاول قدر الإمكان إني أتمس مليون عذر ليك لو عملت أي حاجة غامضة أو مش مفهومة ، وهستنى منك التفسير والتوضيح .
و أنا فعلاً واثقة فيك و واثقة إنك هتساعدني أتغلب على غيرتي و واثقة إني عمري ما هندم يوم إني وثقت فيك



" أحسست أني .. فوق ان أشك ، وأنت .. أنت فوق كل شك "

" أمل دنقل "

وايه يعني لما نتخانق ؟

قعدت في يوم احاول افكر مشاكلنا وحنافتنا علشان اقنع نفسي اني مش بحلم .. واني عايشة حياة

طبيعية

بس فشلت .. رغم ان في مشاكل مش مافيش ، ورغم اننا كثير بنتخاف على حاجات عبيطة ، وساعات على حاجات مستاهلة .

بس ولا كأنا اتخافنا .. لأننا بنصفي قلوبنا أوي بعد كل خناقة ، وفعلاً بمجرد ما نقول لبعض صافي يا لبن ؟ بتكون قلوبنا فعلاً زي الحليب من ناحية بعض ، واللي عارف انه غلطان .. بيصالح الثاني بطريقته لو انا اللي غلطانة .. بتزل أجيب لك كيس شيبسي ، وافكر بوعدك ليا زمان .. انك قلبك أبيض ولو جبت لك حتى كيس شيبسي هتصالحني .

ولما احتاس خالص ونكون بالليل ومش هينفع أنزل اروح اجيب صورة كيس شيبسي وابعثها لك ع الموبايل (:

ولو انت اللي غلطان .. بتجيب لي مصاصية .. وتفكرني يا بني وعدتك ما اباتش ليلة زعانة منك ، وانك بتحبني حتى وانا مكشرة ، ولو حتى كنا الساعة 3 الفجر بتزل وتجيها لو حتى من آخر الدنيا .
ولما ترعيني من غير ما تاخذ بالك واكون محتاجة اني احسسك والفت نظرك ، بجيب لك انا المصاصة وأقولك :

" دي المصاصة اللي المفروض تصالحني بيها علشان عملت كذا وكذا "

ونتكلم ونتناقش ونتراضى ونرجع تاني زي الأول واحسن .

دا سرنا الصغير اللي الناس - حتى أقربهم لينا - ما يعرفهوش ، علشان ما حدش هيفهمنا .. الكل هيعتبر دي " معيلة " واننا قدام المشاكل الحقيقية مش هنقدر نعمل كده ؛ بس انا ما يهمنيش حد .. ما يهمنيش دا صح ولا غلط .. المهم اننا بنقدر نتصافى ونتصالح وعمرنا ما نمثل ليلة زعلايين من بعض ، مش مهم ازاي ... المهم اننا بنوصل لكده.



تعرف اني عاملة لك عمل؟؟

أنا أول كل شهر باخذ مبلغ معين كده وأديه للشيخ بتاع الجامع اللي ورانا ... علشان يطلعه صدقة بنية دوام سعادتنا :)

و لما بعمل لك الأكل بقعد اقرا عليه شوية كلام .. أيووة .. بقعد اقول ياااااااااا رب يطلع حلو علشان هو تعبان طول النهار في شغله و جعان ونفسي أوي اسعده :

جيبك تلاقي ورقة بقولك فيها " بجبك " أو " وحشتني " أو " خلي بالك منك .. انا ماليش غيرك "

بذمتك مش عَمَل جامد وما يخرش الماية ، واحسن من بتاع أم حمبل وأشتاتا أشتوت؟؟

مش یطل ..



سلطة خضرا

بموروووت في عمايل السلطة زي ما انت بتموت في أكلها ، وبحب اعملها في بيتنا وبس... وبحب
اعملها وانت معايا وبس ، لما بعملها من غيرك ما بيقاش ليها طعم .. بتبقى مجرد سلطة .
لكن وياك بتبقى .. سلطة وفرحة وهزار وضحك وشقاوة وطفولة ودلع وكل حاجة حلوة فيك وفيا .

بحبك اوي لما تيجي تعمل تسلل وتخطف مني خيارة ولا ورقة خس ، ولا لما اقرر اكافأك وأكلك انا
يايدي حنة جزرة ولا أوطه ، وبحبك وانت بتترياً عليا وانا بيعط من البصل ، و علشان كده لزقت على
حيطان المطبخ كل الصور اللي صورتهاني وانا بيعط من البصل و معاهم صورك لما تعطفت عليا سموك
وقررت تعمله بدالي .

بحب كمان اخطف منك اللي خطفته من طبق السلطة ونلف ورا بعض الشقة كلها زي العيال ، ولا
شكلك وانت هتموووووت مستعجل ع الأكل وانا بتدلع وانا بعمل السلطة علشان عايزة رشوة ؟ أو
علشان بعاقبك

وبحك اووووووووي وانت بتصالحني لو زعلانة وتقول لي

" ما تيجي نعمل سلطة "



مملكه تحلي لي حدوتة ؟؟

بموت فيك وانت بتحكي لي حدوتة .. من اول نظرة عينك اللي بتقول " مجنونة بس بحبك "

لحد طريقتك وانت بتقول لي توتة توتة :)

بحب اوي الحواديت العجيبة اللي بتقعد تألفها ، وبحب اتلامض معاك وانت بتحكيها لحد ما احس انك

خلاص هتزهق بقى فأسكت كأني تلميذة في ابتدائي قاعدة قدام استاذها فاصعب عليك فتهزر وتخليني

اكمل لماضق:)

بحب أوي اسمع منك حواديت .. علشان بحب احس اني بنتك ، و احس اني عمري ما عشت قبلك ،

وان كل عمري من أول ما اتولدت كان معاك ، و كمان علشان بحب اسمعك وما اتكلمش ، و اراقبك

وانت بتتكلم .. واخزن في دماغي مليون مليون ألوم صور ليك ، و كمان بحب أوي اشوفك وانت محتاس

ومش عارف تفكر في نهاية للحدوتة .. ونقعد نفبركها سوا .

وبس ياسيدي .. ممكن بقى تحكي لي حدوتة ؟؟



الباشا تلميذ ;



زينة رمضان

عارف كان بقالي كام سنة ما عملتش زينة رمضان ؟؟؟ من أيام لما كنت في رابعة ابتدائي ... كانت

آخر مرة اعمل فيها زينة رمضان ، كنت نسيت اساساً ان حاجة زي كده بتتعمل ، كنت نسيت الجو دا بتاع النشا اللي نعملها صمغ وكتب المدرسة والحاجات دي ..

بس ما تتخيلش قد ايه كنت مظأطة وفرحاًاااااااااا لما لقيتك جاي من برة وجايب معاك حاجات الزينة ، وجايب 3 فوانيس :

"فانوس ليا وفانوس ليك وفانوس لابننا او بنتنا اللي لسة ماجاش" .. حسيت كأني رجعت طفلة ..

وعشت بجدة فرحة رمضان ، كان شكلنا يموت من الضحك واحنا مدفوسين وسط اكوام ورق الزينة المتقطع ، واحنا بنحاول نفكر كنا بنعملها ازاى واحنا صغيرين .. واول فانوس ورق عملتهولي وكتبنا عليه اسمنا .. ياااااااااااا شكله كان رووووووووعة .. زعلت اوي لما اهوا طيره من البلكونة لأني كان نفسي احتفظ بيه اووووووي ، بعد ما خلصنا مشروع الزينة اللي نجح بالعافية حبيت اعيش معاك طفولتي بجدة .. روجت جبت نشا وعملتها صمغ ، وجبت مجلات وعملنا فرع زينة صغنن شبه اللي كنا بنعمله واحنا صغيرين ، وعلقنا الزينة زي الأطفال في البلكونة .. فاكروا لما الجيران كانوا بيصووا لنا شرراً كده ؟ و تاني يوم بدأوا شقة ورا الثانية يعلقوا الزينة .



ما طلبتُ من الله في ليلة القدر سوى أن تكون قدري وسددي ، سقفي ، وجدراة عمدي .. وخلال ساعة

الحشر

أحلام مستغانمي

العید ما جانش

العید السنۃ دی ما جاش .. ایوة طبعاً ما جاش لأنه ما مشیش اصلاً من یوم ما بقینا سوا .. کل یوم معاک عید بالنسبة لی ، کفایة ان اول حد بشوفه کل یوم الصبح هو انت .. و آخر حد بشوفه وبسمعه باللیل هو انت دا لوحده عید .

دا غیر انی کل یوم باکل معاک وبدردش معاک ، و بنهزر سوا ... و حتی لما بتنخاق او لما نرخم علی بعض بردو ببقی عید .

بس تصدق .. العید بردو لیه طعم مختلف .. الفرحة معاک طعمها مختلف .. اول مرة اتمنی انی اقضي العید کله فی البیت ، ولما اخرج من البیت ابقى عایزة ارجع بسررعة اوی علشان وحشني البیت .. وحشني اكون معاک وفنزر مع بعض علی راحتنا ، وحشني نلعب زی الأطفال ، نخطف من بعض السودانی واللب والترمس ، نقعد نلعب سوا بلای سٹیشن واللی یتغلب یعمل للتانی شای :)
نقعد فی البلكونة نتفرج علی الشوارع وهي ملیانة فرحة ونور ونقعد نعاكس فی ولاد الجیران الصغیرین من البلكونة ونبص لبعض ونقول فی سرنا امتی بقی یقی عندنا ولاد ؟
یااااااااااااااااااا تصدق العید حلو أوی :)

کل سنة وانت زوجي .. کل سنة وانت حبیبي .. کل سنة وانت عیدی (:



بحب الدنيا لما تضيّق

بحب أوي الدنيا لما تضيق علينا .. لأنها كل ما تضيق كل ما نقرب لبعض أكثر ، وببظمن لما تحصل مشكلة في شغلي أو شغلك أو أي مشكلة تحصل لنا .. وبحمد ربنا على ان نصيينا من المشاكل بيبقى حوالينا مش بيننا .

وبحب أوي احس اني أول حد بيخطر في بالك لما تتضايق والدنيا تتعكر وبتتهزها فرصة علشان أقولك قد ايه انت انسان عظيم ، وانك قد أي مشكلة وقدود .. وبفرح زي الطفلة لما احس انك فكيت شوية وانك اتفائلت وحسيت بالأمل وبالثقة في نفسك .

بحب كمان اننا نقعد سوا نفكر في حل لأي مشكلة ، ونجيبها يمين ونجيبها شمال .. لحد ما نلاقيها حل ، وساعتها بقى .. نكافئ نفسنا بخروجة حلوة على الكورنيش قرب الفجر .

وبفرح بيبك أوي .. كل ما تحصل مشكلة وتقول لي الحمد لله .. اشكري ربنا وصلي ركعتين .. مش المشكلة دي احسن من أي حاجة أكبر ؟

بحبك أوي .. وبحب الدنيا لما تضيق علشان انت بتكون ساعتها البراح الوحيد ليا .



ما فيش أولاد !!؟

حياتنا مش ناقصها اطفال .. انا حاسة انك ابويا وابني واخويا وصاحبي وكل حاجة ، مش ناقصني في الدنيا دي حد ولا حاجة .. وانت كمان .. حاسة انك مبسوط بحياتنا ومش حاسة إن في حاجة نقصاك مافيش أي ملل في حياتنا علشان نستعجل موضوع الاطفال دا ن حاسة اننا محتاجين نكبر شوية .. ونتفاهم اكثر من كده ونكتسب شوية خبرة تساعدنا نطلع اولاد صح .

لكن الأهل مش ساكتين .. كلمة من هنا على كلمة من هنا والكل عايز " الحفيد" . اضطرينا نعمل الخطوة اللي طول عمري بكرهها .. روحنا للدكاترة ، وعدت علينا أيام كلها قلق كأننا مستنين نتيجة الثانوية العامة وجات النتيجة ..

((الأمل ضعيف جداً في إني اجيب اطفال بسبب القلط اللي زمان كنت بريها))

وافهرت .. افهرت لأني حسيت اني هتسبب في مشكلة بسبب اختياري اللي زمان اخترته ، لو مت نفسي كتير اووووي اني ما ضحيتش زمان بجي للقطط ، ودلوقي .. انت كمان هتتحمل تبعات اختياري . وقررت ساعتها اقولك كلام عمري ما اتميت اقوله ، قولته و اتميت من كل قلبي انك ترفض تنفذه .. عرضت عليك تسرحني بإحسان وتشوف حياتك مع حد تاني .. ربنا العالم انا قد ايه كنت بندبح مع كل حرف من كلامي دا ، وعدت علينا أيام لئيسيسيسية أوي لأنك زعلت مني جداً اني هان عليا اقولها ، والحمد لله رفضت واصريت نكون مع بعض ، وفضل الموضوع سر بيننا ، لا أهلي ولا أهلك عرفوا .. قولنا لهم ان كل الامور تمام بس لسة ربنا ما أذنش انت قولتلي ان دا لازم يتقال علشان ماحدش يحاول يفرق بيننا .

وقعدت طيبت خاطري كتييييييييير اوي .. ودلعتني اكر من الأول وحييتني أكثر من الأول .. وانا
موتت فيك زي الأول واكثر.

فاكر الأيام دي؟؟

كل ما اشوف الولد ماجد اللي مغلبي دا افكرها ، كل ما اشوفك وانت بتجبه وبتلاعبه افكرها ،
واقول ياااااااااااا الحمد لله .

قد ايه كنا محرومين من حاجة حلوة ، وقد ايه انت انسان قلبه كتييييييير اوي ويحبني علشان تقرر
تضحني علشاني رغم حبك الكبير اوي للأطفال . عارف افكرت الكلام دا ليه النهاردة كمان؟؟

اسييك تخمن ولا اقولك؟؟ اقولك ولا اسييك تخمن؟؟

هسييك تخمن علشان لما تعرف السبب صح هديك مكافأة وانا بحب اكفأك ;)

أنا وحماتي

أنا عارفة من الأول إن مامتك مش بتحبني .. انت ما قولتش حاجة .. بس تصرفاتها كانت واضحة ، ولما سألتك اكثر من مرة .. أنكرت .

بس لما قولتلك عيني في عينك كده اعترفت ، وعرفت انها مش بتحبني علشان انا اختيارك .. وعلشان انت رفضت كل عروضها بالعرايس اللي - من وجهة نظرها - احسن مني مليون مرة وآخريهم البت جارتكم دي اللي طول عمرها بترسم عليك ، ورغم ان الوضع دا مقلق اوي وكان مخوفي .. بس بردو كان مطمئني انك بتحبني بجد و إنك انسان عاقل ومش بتصدق أي كلام .

بس كان نفسي أوي أحس انها راضية عني .. لأن احساسني برفضها ليا كان جرح كرامتي اوي ، وعلشان كده قعدت افكر ، وافكر ... وافكر وقررت في الآخر إني أعلن عليها :

"اللب"

وعملاً بالحكمة اللي بتقول : " لا رد على الابتسامة الا بالابتسامة " قررت اكون معاها حبوبة وذوق وبشوشة جداً حتى لو انا متعصبة او تعبانة بردو معاها ابقى حاجة تانية .. وعرفت منك عيد ميلادها وكل

مناسبة بتعتر بيها في حياتها وكنت دائماً اكون اول حد يهنئها بالمناسبة دي ، وحسستها اني مبهورووورة بيها اوي ، و استغللت نقطة ان مافيش حد يقدر يقاوم اغراء الكلام عن نفسه - و لأنها كانت بتتجنب تتكلم معايا وبتكلمني من غير نفس - بدأت اكلّمها عنها، واحسسها اني مبهوره بخبرتها في الحياة واسلوبها في التربية واسلوبها في تنظيم بيتها ..

وحتى اسلوها في اللبس و عمل الأكل وكل حاجة ، ودايماً اتصل بيها استشيرها في حاجات كثير ، مش لازم اعمل باللي تقول لي عليه .. بس كنت بحسها اني بثق في رأيها .

فبقت طبعاً تتكلم معايا بكل حماس وفخر وتبقى مبسوفة لما تكلمني .

مش كده وبس .. دا بعد فترة بقت لما تلاقيني بقالي كثير ما روحتهاش علشان مشغولة او كده تسأل عليا وتطلب انها تشوفي علشان عايزة تتكلم معايا .

عارف انا افكرت كل دا ليه دلوقتي؟؟ مامتك لسة قافلة معايا التليفون حالاً كانت بتقول لي اني وحشتها أوي ، وبتقول لي انها حلمت لي حلم حلو أوي وبتقول لي يارب يتحقق علشان انا استاهل كل خير ☺



יום עיד מילא דנא

كانت فكرة مجنونة أوي انا نحتفل بعيد ميلادنا في تاريخ أول مرة اتقابلنا فيها ، رغم انها بجد فكرة منطقية جداً ..

احنا اتولدنا فعلاً يوم ما شوفنا بعض ، انا حببت الفكرة وصدقته لدرجة اني لما حد بيسألني عن عيد ميلادي بقول (

6/24) تلقائياً كده .

ألذ حاجة بقى يوميهما التفانين اللي كل واحد فينا بيعملها من ورا الثاني علشان الاحتفال دا .. فإكر أول عيد ميلاد
لينا سوا؟؟؟

لما اخذتني في أكثر مكان بحبه في حياتي .. كان حلم حياتي بس اني اعدي من قدماه ، اخذتني بالعربية وغميت عيوني ، ولحد ما وصلنا ودخلنا وانت مغمي عيني حتى اضطريت البس نصارة شمس كبييرة علشان الناس ما تقولش علينا مجانين ، ودخلنا .. وقعدتني ... وانا هموت واعرف انا فين ؟

لحد ما جه الجارسون وقال " منورين كافيه ريش يا افندم "

" و!!!!!!!!!!!!!!!!!!!!!!!!!!!! او ریش بجد ؟؟! انا بقالي سنiiiiiiين بحلم اشوفه واعرفه بجبه اوووووووي وانت كمان بتحيه بس بجد ما تخيلتش ان دى مفاجئتك "

ما قدرتش امسك نفسك وقولت كل دا قدام الجرسون اللي بقي فطسان من الضحك علينا وانت

اتكسفت اوووووووووووو لما قولتلك بصوت عالي وقدام الجرسون والناس سمعاني

" بجد بجد بموووووووووووت فيك " وكل دا ومفجأتك ما خلصتش ..

بعد ما شربت قهوتك وانا شربت شايي على ريحة قهوتك ... اخدتني واتمشينا على الكورنيش وكمان ركبتني مركب .. واكلنا درة وترمس وخليتني عملت في ليلة واحدة كل حاجة بحبها وبتمناها .

وبعد ما روحنا البيت .. لقيت مفاجأة كمان :

"تورته عليها صورتك وصورتى" وشكلها قلب جھييل اوووووي

- طب انا مش قادر اسوق

* مش محتاجين العربية هنتمشي خمس دقائق ونوصل على طول

— لَأَغْشِي أَيُّبِيهِ .. اسوق احسن

ونزلنا ركبنا العربية وقولتلك اطلع على الشارع الرئيسي .. وطلعنا على الشارع الرئيسي وخليتك تركن على جنب

• •

وجه دورك بقي ، غميتك زي ما عملت فيا الصبح بالظبط .. ووقفنا وشيلت الغطا من على عينك وشاورتلك على

اعلان کبیر منور ...

الاعلان كان عليه صورتك وكان يقول

"بجـ" _____ لك يا جوزي "

[illegible]

نفظولي الاعلان دا كانوا فاكربني مجنونة ههههههههههههههههههههه

بس عجبك اوووووووووووووووووووووو ، وكل يوم الصبح وانت رايح شغلك تشوفه ، ووانت راجع تشوفه .. وكل

الدنيا مش فاهمة اي حاجة .. انا وانت وبس اللي فاهمين ؛)



بجاول آعود

بحاول اتعود على حبك اللي في شكل أفعال وتصرفات مش كلام .. في شكل عطاء مش مستني قصاده مقابل ، بس

بردو بمحاول المح وسط مشاغلك وتعبك والمشاكل اللي حوالينا حبيبي اللي بيحبني بروقان

بحاول المح فيك حبيبي لما كان باله رايق ومش شايل هم .

وبفضل انكشك بالكلام والهزار لحد ما اخليك تطلع الطفل اللي مخبيه من جواه ، وأول ما المحه .. اهدى واتظمن .

صدقني انا دلوقتي بحبك اضعاف اضعاف زمان ، دلوقتي الذكريات الحلوة بيننا أكثر .. والأيام الاحلى اكثر ، والحب

كل يوم بيننا بيكبر وحابة فيك تحملك للمسئولية وتفكيرك في بكرة .. بكرة بتاعنا ..

وعارفة ان جزء كبير أوي من همك هو همي وهم بيتنا وأولادنا ..

لكن حي ليك بيخليني اخلق ليك في خيالي صورة عاشق خرافي ، بجمع بينك زمان ودلوقتي علشان احبك أكثر

واكثر .. صدقني انا بحبك في كل الحالات .. بحبك وانت رومانسي ولما تكون عملي .. بحبك وانت خيالي ووانت

واقعي ، بحبك وانت مشغول ووانت رايق..

بحبك لما تقولي بحبك وبحبك بردو لما تقولها بخوفك عليا .



فاكر أول مرة؟؟

فاکر اول مرة دخلت بيتنا دا؟؟

كنت متخيلة اني مش هتعود عليه إلا بعد وقت كثير بس بمجرد ما دخلته حسيت اني زي ما اكون عشت فيه عمري كله .. مرتاحة أوي ، ومطمئنة أوي ، فرحانة أوي

طب فاکر أول مرة صليت بيا الفجر؟؟

[illegible]

" يارب اجمعني بيه في بيت واحد .. يارب اسعدني بيه وعوضني عن كل حاجة وحشة شوفتها في حياتي اللهم ان في قلبي مضغة تمفو إلى عبدك هذا فاجع بيننا في الخير "

وفوق و انت بتقول :

"الله أكبر" .. فوقت علی صوتک ، علی ان ربنا استجاب لی

وحسيت كأني عمري ما صليت صلاة بخشوع واطمئنان قد المرة دي.

فاکر کمان اول مرة قرأنا قرآن سوا؟؟

صوتك كان حلو أوووووووي ، و وشك كان كله نور ، ساعتها همدت ربنا إني اخترتك أب لولادي :

طيب فاكّر أول مرة غطيتني فيها ؟؟ لما انا نمت وانا بتفرج على التليفزيون وحاولت تصحيني ما صحيتش فغطيتني وقعدت تجيب لي غطيان من كل حطة في الشقة علشان خايف عليا من البرد اوي .

بصراحة انا يومها صحيت لما حاولت تصحيني بس عملت نفسي نائمة تاني ، كان نفسي أوي احس الاحساس دا ، احس كأني بنتك اللي بتغطيها بالليل وخايف عليها وكنت مش عارفة اقولك ازاي كده ، فعملت نفسي لسة نائمة علشان تعمل كده ..

عارف ساعتها كان نفسی اوووووووووي أقولك " بجهك "

أكيييييييد بقي فاكر أول مرة عملت لك بإيدي أكل ... مش قادرة اوصف لك احساسى يومها ..

انت عارفي بكره المطبخ اووووووي بس لما اكون واقفة في مطبخي

وبعمل أكل لك انت .. حاجة تانية خالص .

كنت حاسة زي ما اكون بعمل عمل وطني ، وفضلت كل شوية رايحة جاية ع البلكونة اشوفك جيت ولا لسة ومش

عايزة اتصل بيك علشان ما تعرفش المفجأة ..

وياسلاaaaaaaaaaaaaaaaaaaaaا م بقي لما جيت ودوقته وقولت لي انه حلو ، كنت حاسة اني بحبني اوووروي علشان عملت حاجة

عجبتك .

ألا صحيح قول لي ، هو عجبك بجد ولا قولت انه عجبك علشان تفرحني بس؟؟

یاتری فاکر اول شهر تقبض مرتبک وقعنا سوا نشوف هنمشی ازای وهنشتري ایه ، وخوش کام ولما اکتشفنا ان

فاضل للترفيه خمسة جنيه بس؟؟ ساعتها انت اتضايقت بس انا فرحت اووووووووووي

الخمسة جنيه دول هيكفونا اكيد نتمشى على الكورنيش في عز الليل ومش هيدخلونا سينما زي ما كنت انت ناوي تعمل .. فرحت لأني هكون معاك انت وبس .. هتتكلم واسمعك ... وأتكلم وتسمعني

وما فيش حد حوالينا ولا معانا

فاکر اول ما عرفت ابي حامل کنت عامل ازاي؟؟ کنت عامل زي الطفل مزأطط وخايف وکنت بصعب عليك اوي
کل ما اقول اه وکنت بتخاف عليا بجد .. عليا انا مش علی ابنا ويس ..

فرحت أوي ساعتها وحسيت اني لسة " حبيبتيك " مش مجرد مراتك وام ولادك ، ولا يوم ولادتي كنت هتتجنن وانا قعدت احاول اكتب صوتي علشان ما تتخضش .. بس انت كنت حاسس بيا .. ساعتها بصراحة ما خطرش في بالي اقولك بجدك لأنني كنت بتألم اوي :

فاكر اول مرة شيلنا ابننا ؟؟ انا كنت مرعوووووووة وخايفة عليه اوي ، وحاسة انه صغن خالص وخايفة اكون بوجعه ، بس بعد شوية بدأت اطمئن وكنت بفرح اوي لما يقعد يعيط واول ما احضنه يسكت .

[illegible]

كل دي وأكثر حاجات حلوة واحاسيس حلوة أول مرة احسها واعيشها كان معاك .. ومافيش حد غيرك قدر
يخليني اتمتع بيها ، كل دا زاد ربنا بيديهولنا علشان نتحمل قسوة الايام ، ولو ان مافيش حاجة في الدنيا دي تقدر
تقسي عليا وانا معاك .

بجبك أوي ، بحب عفويتك اللي خلت لكل الحاجات دي طعم تاني .. بجبك أوي وبحب صدقك اللي مخليني دائماً
مطمئنة ، بحب كل لحظة حلوة ومرة عشناها وعاشينها وهنعيشها علشان معاك
ربنا يخليك ليا :)



هو ايه يعني الفرق بينك وبينك غيرة؟؟

تسألني كل الفروع المتسلقة فوق الأيام بلا جذر : ولماذا هو !!! ..

فلجيبهم : لأنه لا يستطيع أن يكون أنتم !

"عبلة الرويني"



هو يعني ايه الفرق بين حياتي معاك وبين حياتي مع أي حد تاني؟؟ ماهو كله جواز .. وكلها حياة .. وكل حياة فيها مشاكل .

دا كلام ياما سمعته زمان .. لما اخترتك انت بالذات اكمل معاك حياتي ، لما كنت بعيط وانا بصلي وبدعي ربنا يرزقني بيبك زوج واني ما اكملش حياتي غير معاك ..

وقتها ما كنتش عارفة الفرق .. بس كنت حاساه ، دلوقتي بعد 20 سنة من ميلادي معاك أقدر أقول الفرق ..

الفرق إن أي حياة من غيرك هي حياة ملهاش طعم ، أي حياة تاني هتبقى " عيشة وخلاص " لكن معاك انا بجد " بعيش " ..

الفرق اننا بقلنا **20** سنة متجاوزين عمرك ما قولت عليا " ام العيال " ولا " الحكومة " ولا أي حاجة تضايقي .. لا قدامي ولا من ورايا .

20 سنة بتقول عني ملاك واني متحملاك رغم انك انت اللي اتحملت عصييتي وقلة صبري وسوء ظني كثير أوي ..

الفرق بينك وبين أي حد ثاني .. ان احلامنا واحدة ، وحتى لو انا بحلم بحاجة خاصة بيا انا انت بتحب احلامي

الفرق بينك وبين أي حد تاني انك انت الوحيد في الكون بحاله اللي بتفهمني من غير كلام ، وبتحس بيا لو حتى انا في اخر الكون وانت في الطرف التاني منه .

الفرق بينك وبين أي حد تاني .. ايني مخلوقة من ضلعك انت .. واني حنة منك انت .. جزء من روحك .. علشان كده انت الوحيد اللي ينفع تكملني .. مش أي حد تاني .

الفرق بينك وبين أي حد ثاني إن ما حدش كان ينفع أب لولادي غيرك أب بالروعة دي وبالحنان دا .. عمرك ما قولت لي في مرة :

" شوفي ولا انا اذك بي عملوا ايه " ولا رميت عليا المسؤولية لوحدي

لأ .. دائماً بنناقش ونتكلم واحنا عارفين ان دول " ولادنا " مش ولادي لوحدي ولا ولادك لوحدي .

دائماً مخلصهم حاسين إني أحسن أم في الدنيا .. وعمرك ما طلعتني صغيرة في نظرهم ، عمرك ما عليت صوتك عليا
قدامهم ولا حتى حسستهم انك متضايق مني - برغم انك كثير كنت بتبقى متضايق مني .

الفرق بينك وبين غيرك .. انك كنت مصر نعيش صح ، نعيش الحياة بكل ما فيها .. ولغيت من قلبي الاحساس
بالخوف من بكرة .

الفرق بينك وبين غيرك انك عيشتني في جنة في الدنيا .. ورسمت طريق للجنة في الآخرة ...

الفرق بينك وبين أي حد تاني .. إني بحبك انت .. بحبك يا أحلى حاجة حصلت في عمري كله ... بحبك



عند الكاتبة ..

سارة درويش

صحفية ومدونة شابة

شاركت في كتاب " مشروع وطن " وكتاب " مصر في قطعة جاتوه "

وكتاب " دون حذاء أفضل " .

صدر لها كتابين إلكترونيين " مشاعر مُرهقة " و " حكايا السمراء "

للتواصل مع الكاتبة ...

Sarora.darwish@yahoo.com

<http://www.saroradarwish.co.cc>



ملاذي الحبيب وحصني الذي لم أنتهر قبله
بأمان... أنتسرك
أنتسرك لأنك اخترت أن تكون هذا الرجل
أنتسرك لأنك دائما هنا
تمنحني الضوء في أكثر ليالي حياتي عتمة
وتمنحني الدفء حين ينتد الصقيع
تسكرا لأنك تتحملني بكل الحب..
بكل الرضا..
وكل الحنان

زوجي الحبيب.. تسكرا
سارة درويش